



1. Tschanteda dal cussagl cumünel in marcaldi, ils 14.1.2015 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan,

Absaints: Liun Quadri

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 1.400 Multas pumpiers / dumandas per deliberaziun da l'oblig da praster pumpiers
4. 0.212 Tscherna mneder da scoula
5. 1.200 Nouva regiun Malögia, lectüra sböz statüts e consultaziun
6. 6.500 Trafic public Varusch, concept da fermativas e piazza per volver „il trenin“
7. 0.209 Contrat da servitut cun Arno Gabriel per vasca ed idrant in Salvuns
8. 0.209 Lectüra sböz contrat da cooperaziun cul reservat da Biosfera Val Müstair Parc Naziunel e piglier pusiziun
9. 0.700 Abitaziun chesa cumünela, surdeda lavuors lovafuonzs
10. 0.130 CEE-Energia Engiadina, concept rait da fibra, credit fr. 7'000.00
11. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 16.12.2014 vain approvo unanimamaing.

1 1.400 **Pumpiers** **Multas pumpiers / dumandas per deliberaziun da l'oblig da praster pumpiers**

Il president infurmescha, cha'l cumandant dals pumpiers La Plaiv propuona da multer a 4 personas, causa cha quellas sun stedas dapü scu 30% absaintas dals exercizis sainz'as s-chüser. Zieva cuorta discussiun decid'il cussagl unanimamaing da multer 4 personas tenor l'uorden da pumpiers e scu proposit dal cumandant. Impü piglia il cussagl cugnuschtscha da la charta d'üna persuna chi'd es dmurant düraunt l'eivna a Brienz cun la dumanda, da pudair gnir delibero da l'oblig da fer pumpiers a S-chanf, causa ch'el

prasta il servezzan a Brienz. Què ho eir confermo il cumandant da pumpiers da Brienz. L'orden da pumpiers prevezza, scha qualchün prasta servezzan da pumpiers in ün'organisaziun arcugnuschida dal chantun, po quel gnir delibero da l'oblig da praster pumpiers a S-chanf. Il cussagl decida unanimamaing da deliberer a la persuna da l'oblig da praster pumpiers, però cun la pretaisa, cha'l petent inoltra minch'an üna conferma d'avair prasto il servezzan da pumpiers a Brienz. Inavaunt refüsescha il cussagl unanimamaing, our da motivs da pregüdizi, la dumanda d'üna persuna da pudair gnir delibereda da l'oblig da praster pumpiers, respectivamaing delibereda da pajer la taxa da cumpensaziun.

2 0.212 Persunel Tscherna mneder da scoula

Cun la revaisa totela da la ledscha da scoula da l'an passo es gnieu decis, cha la scoula primara da S-chanf vain mnedada d'ün mneder da scoula. Üna collavuraziun cun las scoulas in vicinanza nun es pel mumaint pussibla, siand cha l'interess tar quellas nun es avaunt maun. Cun que s'ho decis da scriver our la piazza dal mneder da scoula. Sün la publicaziun per la nouva piazza sun entredas 2 annunzchas. Il cussagl piglia cugnuschentscha da las 2 annunzchas scu eir dals resultats dals discuors da preschantaziun, ils resultats da las evaluaziuns fattas e la proposta dal cussagl da scoula per la tscherna. Zieva cuorta discussiun decid'ìl cussagl cun 3 cunter 0 vuschs da tscherner ad Elvira Pünchera Bott scu nouva mnedra da scoula cun ün pensum da 20%. Gian Andrea Bott s'ho absanto per quista tractanda.

3 1.200 Uffizis circuitel e districtuel Nouva regiun Malögia, lectüra sböz statüts e consultaziun

Zieva la votaziun da november 2014 regard la refuorma dal territori aintran in vigur las regiuns chi rimplazzan ils circuls. Tenor la ledscha chantunela haun las novas regiuns da surpiglier lezchas chi sun dedas avaunt. In nossa regiun es previs da surpiglier, sper quellas prescrittas illa ledscha superiura, eir il ramassamaint d'immundizchas, il cudesch fundiari e'l servezzan sociel. Tenor la ledscha da vschinaunchas chantunela fuorman ils presidents cumünels da la regiun ün organ transitoric, chi garantescha l'abiledad da la regiun al mumaint cha quella aintra in vigur. Ils presidents cumünels sun autorisos ed oblios, da mner tres acts giuridics correspondentes e da preschanter declaraziuns chi's refereschan a la nouva regiun. Il cussagl piglia cugnuschentscha dal sböz dals statüts cha'ls presidents cumünels haun delibero illa tschanteda dals 18.12.2014 a mauns dals cussagls cumünels, e fo üna lectüra da quels. Il cussagl decida unanimamaing da propuoner da desister sün las differentas cumischiuns chi preparan ils affers a maun da las tschantedas dals presidents cumünels, dimpersè a dess gnir tschernida üna giunta permanenta our dal ravuogl dals presidents chi prepara ils differentes affers. Taunt la scoula da musica scu eir la promoziun da la cultura dessan gnir integredas illas estructuras regiunelas. Uschigliö es il cussagl perinclat cun la proposta dals statüts.

4 6.500 Trafic public Trafic public Varusch, concept da fermativas e piazza per volver „il trenin“

Quista sted dess transir regulermaing e tenor urari „il trenin“ da la staziun da S-chanf fin Varusch. Martin Kohler, l'iniziant dal proget trafic public in Varusch ho inoltro ün concept da fermativas e piazza per volver, chi prevezza dasper las fermativas tar la staziun a S-chanf ed in Varusch da fer eir tar la Punt da Crap ed in Prasüras üna fermativa. Il cussagl piglia cugnuschentscha da differentas variantas e decida unanimamaing da propuoner ils seguaints lös scu fermativas; staziun a S-chanf piazza vers bunura, Punt da Crap tal parkegi per bus, Prasüras tar la tevla d'infurmaziun ed in Varusch suotvart la

chamanna Varusch. Il lö per volver „il trenin“ in Varusch dess esser scha pussibel suotvart la chamanna Varusch. Las trattativas cul proprietari da terrain in quel lö ho da fer l'iniziant Martin Kohler.

**5 0.209 Contrats e cunvegna
Contrat da servitut cun Arno Gabriel per vasca ed idrant in Salvuns**

In connex cul schlargiamaint da l'infrastructura a Cinuos-chel e Chapella s'ho eret da l'an 2010 üna vasca per la colliaziun da las lingias da l'ova potabla S-chanf-Chapella-Cinuos-chel sün parcella nr. 310 in Salvuns. Cun quella colliaziun as po garantir da duos varts la furniziun da l'ova potabla. Daspö lo s'ho fat trattativas cul proprietari da terrain, Arno Gabriel, siand cha la vschinauncha vaiva eir eret in quel lö ün idrant per garantir ün attach d'ova svelt in cas da fö e miss quel in quint. Uossa s'ho pudieu chatter üna soluziun e s'ho stipulo üna proposta d'ün contrat da servitut. Il cussagl fo üna lectüra da quel contrat e decida cun 3 cunter 1 vusch d'accepter quel scu propost.

**6 0.209 Contrats e cunvegna
Lectüra sböz contrat da cooperaziun cul reservat da Biosfera Val Müstair Parc Naziunel e piglier pusiziun**

La zona in vicinanza dal parc es importanta, per cha la Biosfera po tgnair inavaunt il label Unesco. Ils presidents cumünels da las vschinaunchas pertuchedas haun decis da na registrar la zona i'l plan directiv regiunel, dimpersè cha mincha vschinauncha dess stipuler ün contrat cun la Biosfera Val Müstair in merit. Il cussagl piglia cugnuschentscha dal sböz dal contrat cun üna düreda da 10 ans e fo üna lectüra da quel. Zieva animeda discussiun decid'il cussagl unanimamaing da piglier pusiziun seguaintamaing: il contrat da cooperaziun po gnir stipulo uschè scu propost. Ils cunfins dessan gnir adattos insü scu decis preliminar tal cunfin da god, però scha la resgia in Bos-chetta Plauna, respectiv ils prodots da quella pudessan gnir vendieus cul label Biosfera, füss da fer ponderaziuns d'adatter il cunfin dal la zona in vicinanza dal parc, fin tal cunfin da la zona per l'inventar federel dals monumaints natürels BLN.

**7 0.700 Stabels d'administraziun
Abitaziun chesa cumünela, surdeda lavuors lovafuonzs**

Il fittadin actuel da l'abitaziun sül 2. plaun in chesa cumünela ho do aint la desditta per la fin da schner 2015. Aunz cu cha la nouva fittadina surpiglia l'abitaziun, es da rimplasser ils tapets illas stanzas chi sun in ün nosch stedi, cun früst da sur 20 ans. Il cussagl piglia cugnuschentscha da 2 offertas e decida unanimamaing da surder la lavur per eriger nouv fuonzs da laminat a la firma Sergio Zala Inneneinrichtungen GmbH da Zuoz per l'import offert da fr. 4'314.65. Tar la surdeda s'ho resguardo l'offerta economicamaing la pü favuraivla.

**8 0.130 Collavuraziuns intercumünelas
Regiun dal Parc Naziunel, concept rait da fibra, credit fr. 7'000.00**

Sün iniziativa d'interessents es gnieu elavuro ün concept da svilup per la regiun dal Parc Naziunel regard üna nouva rait da fibra. L'informatica scu eir la telecomunicaziun sun sün tuot il muond ün chatscheder principel pel svilup economic. Grazcha a la rait da fibra, paun eir regiuns illa periferia as parteciper vi dal svilup economic. Grazcha a quista rait moderna, pudessan gnir elavuros e promovieus eir progets innovativs in nossa regiun. Per mincha chasada in nossa regiun es previs ün attach. Zieva cuorta discussiun decid'il

cussagl unanimamaing da fer part a la gruppa d'interess e da deliberer ün credit ill'otezza da fr. 7'000.00 per elavurer il proget sün nos territori.

9 9.999 Varia

Il president orientescha, cha'ls tests da sirena da l'alarm generel haun lö quist an in marcaldi, ils 4 favrer 2015 a las uras 13.30 cun l'alarm automatic fat ir davent da la centrela da la pulizia chantunela, ed a las 13.45 cun l'alarm fat ir a maun tres ils funcziunaris cumünels.

A las 22.25 vain la tschanteda alveda.

In buna fè

:

L'actuar:

D. Schwenninger